

ESTRENO FORMIDABLE DI "KEN TA KEDA CU MAMA"



ORANJESTAD(AAN): Cu Mascaruba ta conta cu un elenco respeta di actor y actriznan, a keda demostra un biaha mas ayera anochi, ora cu riba escenario por a mira algun di e veteranonan di actuacion un biaha mas.

Un ovacion grandi riba pia, publico cu a yena sala di Cas di Cultura a duna e actor y actriznan cu a percura pa un estreno formidable di e obra "Ken ta keda cu mama?" di e autor Andrew Bergman y traduci pa Mena Schwengle, dirigi pa Oslin Boekhoudt..

Domi Tromp a haci su reaparicion na un manera excelente den su papel di David, negociante exitoso di arte.

Por a mira e Domi cu hopi a conoce pa su exitonan den cantidad di comedia pa mas di 35 aña.

Su postura, su gesticulacionnan y su mimica pa cada un di e situacionnan presenta tabata di un actor cu conoce su arte.

Marieta Wanopa, cu a percura pa maquillaje y peinado a kita varios aña di edad di Domi cu e trabao magnifico cu el a haci.

Marieta sigur tambe tin parti grandi den e exito di e obra

aki y sigur tambe pa e transformacion di "Mama Sophia" den tres diferente persona.

Sofia a ser hunga pa e actriz Nena Vrolijk, cu aparentemente ta cera su carrera largisimo di actuacion teatral cu broche de oro cu e obra aki..

Cu Nena ta un di e Grand Damanen di teatro na Aruba a keda demostra atrobe cu e actuacion sublime di e actriz.

For di momento cu el a presenta na final di e prome acto, djies pa algun seconde, su expresion di cara so tabata suficiente pa pone sala bay laira cu harimento. E publico den e segundo acto a cuminsa na mira un "mama Sofia" di edad avanza, cla pa bay Huize Maristella y sufriendo di su heup kibra locual a pone cu e mester a usa un "walker".

Su actuacion na momento di kita bata y keda cu pañanan inferior bisti riba escenario y cu gesticulacion di lo kita mas ainda, a ser haci asina real cu por a imagina cu ta les di striptease "e abuela" lo bay duna, y bao di harimento formal di publico.

Mas despues cu Mama So-

phia a sali di camber sin "walker" y di gala bisti pa "cena", por a mira un otro Sophia, mas joven y cla pa goza di "bida".

Durante su di tres aparicion biniendo di un "keiromento" cu su Maurice di casi 90 aña di edad na kende el a namora, publico por a mira un Mama Sophia mas rejuenece ainda y cla pa goza resto di su vida como muher feliz.

Mester kita sombre pa e actriz aki cu sigur ta stimula cualquier joven den sala pa drenta vida teatral.


Geechi Pieters cu tambe a reaparece despues di varios aña riba escenario, a muestra cu ainda e ta un di e actornan grandi di reparto riba nos isla.

Geechi tabata e actor cu mas bien por tabata e personahe cu ta trece rabia cerca e publico cada vez cu e drenta den discusion sea cu su esposa Teresa (Mena Schwengle), cu David, of cu Barbara (Enid de Lannoy) esposa di David. Y ta net esaki a haci su papel fuerte, cu un actuacion magnifico.

Mena Schwengle tambe a brilla y tabata e actriz mas joven di e elenco di veteranonan di teatro.

El a hunga su papel asina realistico cu bo ta puntra bo mes si den vida real, asina "mimo" y "fastioso" e por ta como mama, y esposa. Mena tabata crece y crece den actuacion y tabata "grandi" tambe den e obra aki.

Hopi publico no por a goza di Maurice (Oslin Boekhoudt), pero pa e minuutnan cu e tabata riba escenario, publico a goza di un "gran actor" cu ta brilla den cualquier papel cu e hunga.. Como pintor famoso di casi



Aki ta momento cu Barbara ta puntrando Teresa: "Ta ken ta keda cu mama?"

90 aña, Oslin, a carga basta di e obra lagando publico cu gana di mire mas durante anochi.


Y finalmente no por keda sin menciona Enid de Lannoy.

Enid, actriz 30 aña caba cu Mascaruba, despues di 15 aña a presenta riba escenario na Aruba. Apesar di e tantisimo trabao di ultimo lunanan pa duna negoshi di su mayornan "Casa de Lannoy" un "New Look", y cu su reapertura siman pasa, el a haya tempo pa ensayo casi tur anochi ultimo simannan pa su presentacion como "Barbara".

Por a mira e Enid como actriz formidable cu tur hende a conoce den "No mata bo Curpa", y "Chanita" di Nchi Arubiano, pa menciona dos di e tanto obranan den cual el a actua y balia (e

bailarina indian di e obra Macuarima). Enid mas bien por a ser considera e actriz estelar di e anochi, hunto cu Domi y a percura pa hopi di e momentonan mas agradable di e obra cu sigur lo percura pa salanan yen henter fin di siman y e siman venidero den su siguiente presentacionnan..

Mester menciona sinembargo cu esaki no ta un comedia di harimento "Veneranda Dañarol", "P.P.P.G.G.", "Chispa di candela", "hotel Paradiso" pa menciona algun comedia popular di Mascaruba. Ken ta keda cu mama? ta un obra cu hopi humor den e dialogonan y den expresionnan y gesticulacionnan y actuacion, pero cu su seriedad, mensahenan, y topico di hopi actualidad.



Maurice di casi 90 aña cariciando su "Sophietje". (Oslin y Nena den nan rol.)

**CHS CONTRACTING AND
TRADING COMPANY N.V.
ARUBA. AGENT FOR**



**AIRCONDITIONING.
ANNOUNCE NEW SHIPMENT
SPLIT AIRCONDITIONING
WILL ARRIVE SOON!!
TEL: 31413-FAX: 31312**



Barbara y Teresa discutiendo problemanan di Ester cu su yiu muher Clara.